



30. august 2023

UKA 2023/133

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imaattoq matumuuna saqqummiuppara:

Inuussutissalerinermut uumasullu nakorsaanut oqartussaaffiup tiginissaanut alloriarnissap tullia suussanersoq pillugu apeqquteqaat aallaavigalugu oqallisissiasatut siunnersuut.

(Inatsisartuni ilaasortaq Aqqalu C. Jerimiassen, Atassut)

2019-mi upernaakkut Inatsisartut ataatsimiinneranni siunnersuutigisimagaluarparput inuussutissalerinermut uumasunullu nakorsaqarnermut oqartussaaffiup tiginissaa pillugu nalunaarusiortoqassasoq. Taamanilu Inatsisartuniit akuersissutigineqarpoq UPA2020-mi nalunaarusiaq Inatsisartunut agguanneqassasoq. Taamanilu partiini tamani piumassuseq tapersiinerlu annertungaarmat allaat toqqaannartumik oqartussaaffiup tiginissaanut ataatsimiititaliami sulillutik aallartikkaluarput allannguutissamillu siunnersuutaasussamik suliaqartoqaraluarluni. Taamanili inernerivaa nalunaarusiortoqarnissaanut siunnersuut attallugu Inatsisartut taasimmata.

Nuannaajallannaqaaq taamani, Atassumiit Naalagaaffeqatigiinnermut attassigallarusuttutut oqariartortartuugaluarluta takutikkatsigu nunatsinni aningaasaqarnikkut ineriartortitsinissamut nammineerneruleriartuaarnissamullu piumassuseqarluta tamanut takutikkatsigu.

Ajoraluartumilli taanna nalunaarusiaq Naalakkersuisut naammassisimanngilaat, naak aatsaat 2021-mi Inatsisartunut qinersisoqaraluartoq. Utaqqiinnarnata nikeriaqqinnissamut iliuuseqaqqittariaqalerpugut.

Naalagaaffinngorusunnermik oqaluinnartoqarnera oqarluartaartoqarneralu aatsaat taamak annertutigaaq, inuillu politikkerinut utaqqiinnaleqqapput. Piumassuserli nukiusimappat ila qanga qanga naalagaaffik piviusunngoriikatassimassagaluarpoq. Atassummiillu suleqatiseraassi aningaasaqarnikkut, nammineq pilersornermut, oqartussaaffinnillu tigusinissamut siunnersuuteqarnitsigut.

Sooq inuussutissalerinermut oqartussaaffiup tiginissaa uteqattaangikkaluarlugu Inatsisartut suleqatiserivassi maanna inuussutissalerinermut uumasunullu nakorsaqarnermut oqartussaaffiup tiginissaanut suliaq aallartisaqqullugu.

Uanilu apeqquteqaat aallaavigalugu oqallisissiasami Inatsisartut paaserusuppassi, alloriarnissamut oqartussaaffiullu tiginissaanut suna tullinnguunnersoq. Naalakkersuisut saqqummiussereersimapput oqartussaaffinnik assigiinngitsunik tigusinissamut pilersaarummik. Suliarli tamaanga killiinnassanngippat maangaanniit kaammattuutigerusupparput naalagaaffimmuut isumaqatiginninniarnit aallartisalereersinnaasut.